

四庫全書

集部

欽定四庫全書

溫恭毅集卷二十一

明 溫純 撰

五言律詩

同子成遊說經臺

爲結烟霞侶，因過尹喜門。  
停車逢白鶴，揮麈聽玄言。  
瑤草經春長，琪花冒雨繁。  
真源如可問，待月坐黃昏。

其二

從君探世業道德五千存紫氣烟雲合丹崖日月屯有  
無觀妙徼恍惚盡乾坤似得真常脉先天可細論

送辛四景虞應癸未試

持憲神羊著叅軍草檄名

景虞之  
世父父

白眉憐馬季綠筆笑

江生風入鵬南翼雲蒸冀北程黃金臺望遠萬里正含  
情

內丘曉行

秋色撲帷清侵晨傍柳行衣牽朝露濕花映曉霞明拙

病憐吾道江湖寄此生華峯雲日近忻慰倚門情

過邯鄲

驅車出北平暮向邯鄲行秋在風前樹波連雨後萍  
三千趙客十二傲秦城此日哀陳迹平原草木生

邯鄲李希聖明府枉過小坐

旅病憐秋色相逢一解頤看君花滿縣愧我鬢如絲  
把酒還聽鳥開襟且論詩黃梁今已熟那計夢回遲

武陵城樓送李少叅之關中

登樓愁望遠把袂又逢秋共訝謫仙去誰憐落葉稠魂  
飛岫谷道月滿洞庭州相見知何日桃源好駐舟

送李懋推放歸

拜夕憐青瑣飛霜獨犯顏長留忠膽在不惜壯心閒聖  
主恩波渥逐臣鄴下還賜環應有日那得戀東山

過武關

關塞空秦漢風塵感歲華猿啼惟鳥道犬吠有人家孤  
嶂天疑近窮途日易斜商山知不遠吾欲了生涯

夏日同裴太僕泛西湖

剛憐簪乍盍却恐袂仍分  
槎入六橋柳盃浮二嶺雲  
雨餘荷欲長風送磬常聞  
半日跼趺坐相將譚梵文

又同登萬松嶺

攬勝對高春銜盃俯萬松  
人疑乘鳳舞亭似藉雲封  
湖海當簷盡山林引興濃  
願言婚嫁畢同此醉芙蓉

豐樂亭赴成君廸太僕宴集

久別成萍梗相逢盡日停  
論心憐玉署把酒續廬陵  
雨

霽青疑染花開爛若蒸豐年仍可樂千載共茲亭

春日詹直指招飲胡太守園

亭榭倚危岑登臨愜賞心山疑浮海市人似到雲林  
花氣撲簾入歌聲雜鳥吟相看春意足底用出郊尋

望隴

絕恨風人痴忍爲九我詩呼天親固極愛日我何知想  
像松楸裏瞻依夢寐時重將菜彩舞泉路以爲期

海潮庵

古寺碧雲邊登臨息萬緣法堂留月照衣鉢付燈傳近  
水花饒笑開簾鶴欲前相逢天竺客說破野狐禪

初夏同雷健夫馬子充遊子德園

雨霽夏猶春班荆白首新名花香入座幽鳥語依人絳  
帳經誰授豐城劍有神相從三博士星聚恐驚荀

社集弟居

景色倍晴和相逢鬢盡皤簷荆花疊錦風樹鳥成歌結  
社春連夏開尊酒似河不知禽慶侶何處戀青蘿



邵陽曉發

侵晨出郭門蕭瑟望朝暾霜逼秋禾熟日烘野馬奔  
兵戈連塞徼耕鑿幾烟村撫景臨岐路淒然欲斷魂

園中望先塋感愴用百歲吾偕汝句

無情花自發底事鳥如歌本爲逍遙適翻令感愴多  
望雲封若斧滴酒泪成波百歲吾偕汝那堪誦蓼莪

過夷門有懷西亭宗正

傳經憐帝子垂淚過夷門幾載詩笥廢千秋藜杖存鶴

歸疑見汝草綠正傷魂在笥文仍富相思夢裏論

寓天寧寺蘭上人房

寶塔何年剏相傳自盛唐一燈留法界片月照迷方  
山歛浮雲盡風翻貝葉香無生如可學吾欲泛慈航

送袁微之赴漁陽劉公幕

從來震燕領肯作一書生投筆辭南國揮戈向北平  
亦知龍射斗常有燭籠旌欲樹封侯績羞稱任俠名

胡子芳移居為余比隣

何意離群友相逢更比隣  
醉歌吾潦倒岸幘爾情真  
寶劍光騰斗春林花傍人  
子虛如有賦早晚敲楓宸

題馮仲元園

豈厭紛華擾而從此結廬  
峰連樓蘸水月送塔翻除  
改席花疑闕題詩竹可書  
歸來吾羨汝不歎食無魚

喜馬子儀至得二親信

簷雀噪曾頻乍逢問二親  
喜聞顏似玉應是壽長春  
桃熟蟠山近蓮開玉女隣  
思歸扶杖屢對景可全真

送子儀歸用何仲默先生韻

去住應難別，賡歌欲暫留。  
捲簾還對月，繞檻復栽榴。  
雨霽看行鴈，烟開憶釣舟。  
知君歸里日，芳草傍清流。

寄弟

吾仲幾傳書，飛騰興欲舒。  
看雲愁見鴈，彈鋏嘆無魚。  
經學三冬足，鵬搏萬里餘。  
雪霜亦雨露，努力愛居諸。

慶成宴恭述時萬歷丙子純以太僕少卿侍殿  
中

子夜南郊薦寅賓北極臨陽生飛琯應樂奏慶雲沉魚  
藻君臣樂簷梅天地心玉音親命酒既醉荷恩深

其二

九重欣晝接三祝慶良辰寒鍵初陽啟和顏七日親歌  
諧魚出聽舞徧鶴來馴喜起瞻前代皇仁自近臣

上元同劉敬甫送弟從戎

海內風塵滿憂時可奈何暗香梅自發積雪鬢全皤任  
俠揮長劍銘勲望伏波竚看麟閣畫握手醉烟蘿

其二

三五團圓夕留連離別時還從姜氏被預想謝家詩春  
入池塘草路分南北岐吹毛刀可贈萬里以爲期

長安會館赴同鄉公宴

鶯燕驕春永芬芳得閨偏上林花易發旅邸月同圓簪  
遇青晴盍杯從綠樹傳感恩爭報主周歷萬年延

送子儀還里

折柳送君時銜杯動客思青春堪作侶好景且留詩隴

月千山隔鄉心一鴈知高堂問消息休道鬢如絲

季夏同家弟邀妙上人園遊會大雨河漲

底事驟清涼開襟共此堂正逢甲子雨況是水雲鄉說  
法風帆定無機魚鳥忘一身天地小吾亦愛吾狂

溫恭毅集卷二十一

欽定四庫全書

溫恭毅集卷二十二

明 溫純 撰

七言律詩

遊青柯坪

削成絕壁倚危梯  
剛到山腰眼界迷  
爲近天門尋白帝  
故從鳥道拄青藜  
銜杯欲並峯蓮吸  
得句先攜玉女題  
正好乘風凌絕頂  
歸來恐作舊人啼



其二

徙倚探竒恣壯遊，幾番回首憶秦州。  
千年紫氣從關過，九曲黃河入檻流。  
舊國城連芳草合，昔賢丘與野烟留。  
山靈何處鍾豪俊，爲輩長安億萬秋。

春日二園社集得餐字

載酒尋春賦考槃，不勞折簡罄交歡。  
閒依花徑班荆坐，漫采園蔬作脯餐。  
樹裏鳥鳴驚客到，池中魚躍解人看。  
醉餘散髮忘歸去，笑擊空明把釣竿。

蜂房次遠卿韻

午餘蟻國夢初醒  
閒看蜂衙鬧晚晴  
股帶花鬚香粉合  
口銜窓楮屋廬成  
振振休說螽斯羽  
肅肅如屯細柳營  
目擊從王齊殫力  
杞人何事但憂傾

郾城三宗侯招飲

王孫臺榭倚雲成  
落日銜杯聽嘒鶯  
遠檻龍岡團月色  
當筵熊耳暗松聲  
桐分周葉推唐國  
雪似梁園賦宛城  
家學傳經劉向在  
燃藜夜夜燭長庚

繡春臺宴集

臺榭連雲載酒登相逢春色錦千層名花豈自雒陽得  
危檻還從樹杪凭坐對清峨頻徙倚杯浮星月欲騫騰  
夜深留滯渾忘去回首東林日已升

登黃鶴樓

危樓高聳捍荆襄不見當時鶴再翔跨鶴欲從仙侶去  
開尊疑對酒家狂金沙鸚鵡連芳樹二水三山帶夕陽  
笛裏梅花何處落一聲風送五雲傍

中秋仲宣樓送秦藩伯之滇南

蕭瑟登樓聽郢歌，共憐王粲住征舸。  
逢秋嶺月當簷勝，戀客江花入檻多。  
雲裏衆人瞻日色，天涯雞足待春波。  
使君一去千山隔，尺素遙看鴈影過。

同鄒秦二使君遊德山

孤峯突兀俯群山，遙望江湖碧一灣。  
善卷池連青草合，高僧塔共野雲閒。  
聽經鶴去烟霞外，采藥人來杳靄間。  
一局殘棋鐘磬落，招提盡掩不知還。

登岳陽樓

飛樓蘸水倚連岡，悵望仙踪竟渺茫。  
龜鶴峻嶒囊已盡，江湖環遶帶仍長。  
賈人逢遂龍噴浪，巨蟒離池劒吐芒。  
猶有梅花當面發，不堪吹落洞庭傍。

同李杜二使君望太和山

危樓縹緲倚雲成，西望名山勢若平。  
太液揚波晴亦雨，天門返照夜還明。  
相逢李杜饒新句，幾遇金蘭感舊盟。  
安得乘風凌絕頂，紫霄長聽步虛聲。

又同飲李太史宅時太史尊人孝廉在坐

郊行幾度駐江干江上多君賦考槃  
蒼翠松姿春不老蔚藍山色夏猶寒  
開尊重引探竒興投轄還兼舞綵懽  
共向隆中占象緯弓旌行指卧龍灘

送方允治勲部應召

隆中抱膝許尋盟紫詔俄傳出禁城  
畫省移官新主意草廬勸駕故人情  
逢春弱柳迎旌旆對月芳樽倚鑑衡  
照乘隋珠攜滿袖知君蚤晚獻承明

登太嶽

高薄層霄禮上玄徘徊回首笑塵緣  
烟生萬壑疑無地雲散孤峰忽有天  
虎豹關開風送入丹鉛竈冷火迷傳  
榔梅似是真消息獨立蒼茫思渺然

送王茂大之閩鹽運

時李本寧偕行

一麾十載浪難平此去安流萬里行  
盡日關心鹽鐵論幾時回首鳳皇城  
葵榴滿路風烟好李郭同舟藻思生  
九曲河流終到海飛騰蚤慰故人情

江村夜渡

休沐同遊江上村  
尋春徙倚到黃昏  
舟車遠望無南北  
星月平臨互吐吞  
傍水花陰侵座入  
當簷山色伴雲屯  
相逢莫作乘桴嘆  
兀坐中流過海門

題李太僕看雲池卷

荆樹相看  
不記年  
耽詩共詠  
鵲鴝篇  
謝家得句  
饒春夢  
杜甫多懷  
但晝眠  
海上池連  
芳草畔  
天涯雲在  
夕陽前  
故園招隱  
馮誰賦  
難弟風流  
亦謫仙



信陽道中阻雨次楊使君韻

行春單騎出郊隄風雨更闌鳥道迷但使閭閻無犬吠  
何妨林野對雞棲賢山夢寐驚鍾斗潞水潺湲動鼓鼙  
莫道隨車饒大澤主人餘潤自東西

同趙汝存宿大關山洞借食僧家

簇錦傳燈照眼明興來披豁總關情觀風轉向雲巖下  
得侶何妨鳥道行辟穀山中容我住采芝方外有僧迎  
逢人說盡金銀氣誰向空門問此生

登金山寺

特立中流瀾倒回振衣極目此徘徊  
尋源有意乘槎去對景渾疑跨鶴來  
雨霽龍宮行日月潮迴蜃氣接樓臺  
入瞻座上西來像為汲中泠供一杯

其二

蘭若飛懸龍象孤直成淨土一塵無  
天開寶地金生穴波湧祇林鏡作圖  
捨筏凌虛從葦渡離緣入定愛河枯  
珠宮容我棲禪室秋水空明片月俱

其三

水月澄空靜不流，那分南北照神州。  
皇圖鞏固天爲塹，湯沐滢泃海似漚。  
朝貢越裳航萬里，車書吳會奠千秋。  
觀濤誰著三都賦，江上應標此柱留。

仲夏定海招寶山同王將軍張憲長觀水陸大  
操

山河一統鞏皇圖，拜命東南鎮海隅。  
賈勇旌旄雄虎豹，先登精銳競蝥弧。  
期標南國千年柱，如渡西川五月瀘。

亦喜務農休士馬恐因忘戰啓憂虞

其二

紫電清霜武庫多轉輸誰是漢蕭何將軍不喜髀生肉  
甲士翻嫌海息波懸哨如龍麟谷鴿銜枚似起蔡州鴛  
陣頭目極吳門練疑有驂騑傍水過

遊靈谷寺

出郊爲訪誌公林塔影還從靜室臨象外滌襟泉有德  
階前鼓掌地成音忽聞鳥韻驚迷性漫倚松濤試定心

幽寂偏宜騶從去獨留明月伴謳吟

王陽德大叅伯仲邀飲墨池園池即右軍洗硯

慶謝氏夢草堂在側

選勝名園傍斗城客來倒屣笑相迎欄成曲折花爭發  
坐倚芳菲鳥不驚生草塘餘靈運夢臨池家紹右軍聲  
主人且莫言投轄還欲重爲結襪行

虎跑泉寺同孫樞相王李二柱史宴集次蘇韻

時王柱史將代

林深地僻構禪堂雨霽風來襟袖涼  
花發滿原春未改  
燈傳列祖月同長  
清時且喜成三笑  
話別先愁各一方  
好景共遊難再得  
醉餘且覓虎泉嘗

上已邀司馬汪公伯玉遊西湖

乘時脩楔向烟波為愛風流晉永和  
久別琴樽霜入鬢  
乍逢湖海酒如河  
移舟曲傍蘇堤柳  
躡躑高捫葛嶺蘿  
入夜論文真倚玉  
陽春誰和郢人歌

雁山瀑布

乘興尋幽到海涯懸泉千仞溜爭奇空傳如練玄暉語  
笑絕翻盆杜甫詩雲裏飛虹終想像風前瀑布亦參差  
千秋爲汝標名字白玉生烟豈曼詞

同胡藩叅蔡憲使集永嘉江心寺

紺宇空懸面面低觀風聊此一攀躋閒橫雙眼扶桑盡  
細話三生弱水迷獨立潮頭天上下平臨塔影月東西  
經行處處堪垂泪敢道波澄靜鼓鼙

其二

異地金焦江上齊又如艷潁起招提水雲亂鎖青蓮合  
天地雙瞻北斗迷盡日皈依留幻境逢人耕歛問遺黎  
相看誰是東南柱謾向中流握管題

同孫侍中王李二直指遊北高峰次靈隱寺壁

韻

蠟屐登臨結侶行高峰勝處還再更萬木扶疎欲填壑  
群山迤邐如環城當簷月到徙松影隔嶺風來聞潮聲  
秉燭同遊不盡興况逢秋色含別情



送孫以德太史還朝

西湖秋水映芙蓉不盡攀留別思濃  
已藉青藜空白屋共言江海得人龍  
金蓮寵錫仍歸第玉笋先班復聽鐘  
此去九重紓側席應多上賞及儒宗

同胡奉常集燕子磯

丹崖峭壁欲迴瀾直挿中流作柱看  
影落江心疑燕度根連鍾嶺隱龍蟠  
逍遙盡日機全息花鳥逢春興未闌  
況是皇家豐芑地河山長輦萬年安

送劉中丞汝觀

中丞直道去長安始信人間行路難  
滿目風塵多按劍知心天地幾彈冠  
論功自昔歸何晏平夏于今數范韓  
即向東山尋謝傳莫因一夢笑邯鄲

重遊永嘉江心寺

江心一柱障波流再入烟雲豁兩眸  
近海疑從天外望凭虛如向斗間遊  
乾坤萬里誰函盖南北經年自去留  
泣血迸空憐杜甫杖藜不盡古今愁

瓜步卽事

夕陽古渡問前朝北指瑤花觀未遙  
京口尚連秦漢月海門不斷古今潮  
遺宮芳草沿江渚異代秋聲引玉簫  
醉卧欲消千載恨夢回猶記鶴相招

游禹穴同姜憲使商大理朱太僕王新建集舟  
中聽童子歌予勸民詩

謁帝因耽萬壑烟相逢如到畫圖前  
開簾席對花間月倚檻杯浮鏡裏天  
共醉良辰蘭曲酒肯迴深夜剡溪船

此時豐稔仍歌咏猶恐春秋詫有年

送少司農梁公北上便道省親

司農拜命向長安滿目甘棠四野看  
楓陛行瞻曳履重椿堂先得舞衣歡  
旌搖玉屋衡星曉酒盡蘇門對月寒  
爲賦大東臨祖道憑君切直奏金鑾

同子忠登牛首山

探竒躡蹠歷危廊披霧乘風到上方  
醉向空中捫日月夢回雲裏聽笙簧  
卽看紫氣連高闕似遇青牛過故鄉

美景况逢詞賦侶，總非吾土亦相羊。

同胡子忠重遊燕子磯，聞我兵復朝鮮。

寶閣重登酒半闌，相逢春色映層瀾。  
飛磯豈學銜泥燕，近水常留折芾灘。  
日送花陰侵座入，夜耽碁局把杯彈。  
東征忽報師全捷，賭墅風流憶謝安。

答王元美蕪懷敬美

一代才名衆豈如，幾年高隱蚤懸車。  
有時搦管揮文藻，盡日耽玄味道書。  
難弟金蘭交不淺，元方夢寐跡仍踈。

且憑魚鴈訂歸計那得相逢海上漁

夏日同遊李氏園

亭子高連睥睨齊相逢倒屣共君躋尊開北海憑溪轉  
坐對西山返照低金闕曉開雲外擁玉樓烟裊雨中迷  
清時休沐堪乘興刻燭新詩子夜題

其二

主人結屋帝城邊一徑斜通御柳烟翠色雨餘山吐月  
綠陰風淨水銜天芳樽對爾沿溪坐好景憑誰作賦傳

醉後登樓還徙倚忽聞更漏不知旋

再遊李氏園

重憐幽寂再開筵信步乘風到斗邊  
竟日同爲園際客百年君是酒中仙  
看山日落中原盡倚韻詩慚大歷前  
自笑支離歸去晚不妨盡日坐雲烟

五日同使君謁子貢祠對酌

舊宰祠堂背郭橫肩隨旅拜向簷楹  
千年墻室窺瞻好五日椒蘭感既生  
拂坐薰風思解慍盈卮蒲酒對澄清

執鞭豈爲文章業所至長留奕奕名

其二

勝地相從引興長低徊盡日思望洋踈林隔水鶯相和  
細雨銜泥燕並翔風物天涯催鬢改駒陰時節憶年芳  
賜沾宮扇先朝事彷彿佳辰侍帝傍

夏日邀徐君羽飲子由亭

天漢風流見使星乾坤此地剩孤亭懷人汝上雲連蜀  
下榻尊前月滿櫺風雨聯床髮半綠江湖揮麈眼同青



夏陽不盡相看思有約春深此更停

邯鄲合族建追遠祠志喜

憇邯幾佳呂公軒何意支流派最繁接武箕裘多國器  
將文點竄為家門從知姬姓本同氣況乃唐封出太原  
譜志分明非漫合不妨兩地薦蘋蘩

送蕭可發直指還朝

皂囊欲奏建章前使者停驂尺五天莫論埋輪稱柱史  
已從攬轡向秦川澤覃涸轍全蘇鮒霜入穹廬欲淨烟

結綬交情頻徙倚  
笑看父老擁離筵

題新築尊經閣成

泮宮高閣切雲成  
藜杖將分太乙精  
滿架縹緗過二酉  
當簷奎壁引長庚  
筆從衆燮齊冲斗  
帶合雙流兩抱城  
柱史神君收地脉  
重看文獻在西京

宿報國寺同僚胡劉諸君枉過次韻

銜命停車傍帝城  
郊門況有故人迎  
一燈夜照祇林鶴  
四月春留上苑鶯  
紫氣忻瞻丹鳳入  
珮聲喜傍玉河行

明朝伏陛承清問數馬還愁愧問卿

王言卿精膳還朝雪夜枉過有作次韻

風塵荏苒二毛侵說劍虛憐許國心豈向延津龍竟合  
何如剡水棹空臨笑看松徑開精舍醉倚梅花賦上林  
康濟有人堪吏隱不妨青眼共浮沉

其二

賦就陽春雪滿林地分清切主恩深聞曹亦是調羹侶  
小技終成奏岳音萬里乾坤眼欲盡百年意氣酒重斟

只愁灞上仍如戲到處腥羶入塞侵

立春前二日雪中謝賜元旦宴鈔時歲庚子兩

立春也

屠蘇開宴舊時傳楮幣承恩此日偏六出花飛霑帝澤  
滿朝虎拜慶堯天靈臺已奏春如閨太史將書歲有年  
况欲發藏憐遠戍竚看南北淨烽烟

立春次日朝天宮習儀

鞭鳴雞唱曉風寒樂奏臚傳慶履端玉帛趨蹌來萬國

衣冠舞蹈集千官  
奠開氣轉三陽節  
雪霽春回太乙壇  
聞道上方將進酒  
嵩呼齊祝萬年懽

答沁水王次來韻

桂樹別來幾見秋  
每憑雲樹憶并州  
一從碣石論文後  
誰向梁園授簡遊  
春色朱門芳草合  
天涯華髮旅魂愁  
開緘忽睹相思句  
倚韻詩成月色幽

九日聖駕閱壽宮奉命同豐城李侯守崇文門  
時有綵羅之賜

鵷班扈從出長楊魚鱗欽承被寵光鳳闕雲迴星拱極  
鑾輿霞映帝垂裳杯浮金菊開芳徑雪疊香羅出尚方  
矧目八荒登壽域歡歌游豫頌君王

其二

九日天高爽氣開五雲縹緲駕東迴為占萬代興龍地  
非戀千秋戲馬臺綺賜群工沾雨露香分御座近蓬萊  
披衣拜舞同居守挾纈還期遍九垓

又同登觀象臺

仗劍登臺欲躡雲不妨蕭瑟對斜曛  
平臨睥睨連山色危倚璣衡傍斗文  
天為宸遊開夕霽人因佳節坐宵分  
宣傳雨露寬秋賦動地歡聲處處聞

南郊陪祀

雪霽郊壇對越時恍疑朝拱萬靈知  
深宮慄慄應無數上帝洋洋若有私  
運際貞元天地合節臨亥子斗杓移  
閉關已得扶陽力定有春輝徧海涯

送元閣假歸

湖上題詩袂分那堪乍晤又離群歸心豈爲三珠樹  
啟事常依五色雲驛路雪梅春的皦江城烟柳日氤氲  
晉公元繫蒼生望莫戀家園綠野醺

謝賜慶成宴具後合請建儲畢婚用漢甫司寇

韻

入趨楓陛自郊壇咫尺天威欲報難推食幸從今醢暑  
伏蒲豈學漢師丹龍顏日爲前星霽燕翼春將少海團  
况有雉鳩相對喜關關水際傍金鑾



閱蔡弘甫薛魯叔文德任試南宮之文喜賦

杏花春色望中新賦就歡馮狗監陳鞭似祖生先競著  
璞如卞氏晚同珍已省劍氣冲牛斗豈爲山靈誕甫申  
莫道禹門高萬丈雷聲震處是通津

送米仲詔之令銅梁

米家書畫舊懸簾羨爾還兼諭蜀才春色滿林供客眺  
桃花百里向江開重飛故國雙鳬去再過關門紫氣迴  
公暇揮毫應盡興徧添珠玉在山隈

送劉中丞希哲之鎮漁陽

禮樂當朝老奉常恍如邵轍向漁陽逢時不爲雞聲舞  
出塞行看劍氣長左輔瘡痍憑鵲起北門鎖鑰屬鷹揚  
但令欸塞仍依舊歲歲呼韓似越裳

送來望之司馬出守山海關

天門虎豹擁燕山不數崢嶸函百二關留客著書占氣紫  
趨庭遶膝有萊斑行間擊柝金湯固枕上行師壁壘閒  
起草首回司馬署去天咫尺豈違顏

送李本寧左遷安豐

久別含情思惘然，寧知乍晤是離筵。  
共憐大旱當堯日，誰以薰風佐舜絃。  
汲黯官階新積後，漢文宣室席虛前。  
勸君莫唱搖紅燭，鵬翼終看傍九天。

其二

文雅官聯憶半千，提衡不是縮楊禪。  
舊栽桃李知時雨，此去風流亦謫仙。  
江上芍陂爭灌溉，城南花塢任芊綿。  
公餘把酒題應徧，分付雙魚向北傳。

雪中謝賜藕少宰裴公元闇司寇謝公漢甫中  
丞郭公哲卿有作聊和

雪裏陽春天地心特將碧藕代甘霖  
薦餘九廟歆精白賜及千官盡珮簪  
鳴世多懷饒郢曲許身欲報愧南金  
堂隅愁有號寒者廣庇還思萬屢深

其二

虎拜追隨鵷鷺行山公何意倦迴翔  
嘗新如荷絲綸重求舊難忘側陋揚  
况有清通爲啟事正逢簡注坐垂裳

題詩恐賦歸來去欲濟馮誰作大航

五鳳樓前祝聖壽修十餘年曠典也時月望于

十六日祝當其望云志慶

歡逢曠典慶丹墀正是中秋月望時虎拜樓前新禮樂  
山呼堦下舊威儀箴從大寶金爲鑑歌和長春酒進卮  
最喜連朝翻袞袖且傳達孝萬方知

先是奉命十七日早合內外諸臣于五鳳樓前

祝釐次韻

佳節巧連華渚辰詔傳五鳳聽雞人雲霄咫尺顏應喜  
玉帛趨蹌意總真即向彤庭歌既醉先從玉宇賦千春  
況聞指日收中貴念及遺黎處處貧

秋日憶早朝

當年朝拱斗星移飛鳥迴翔亦有期靜聽雞鳴金鑰動  
喧傳象過玉珂隨肅清秋色連宮闕咫尺天顏入夢思  
何日鼎新三殿後侍臣重睹漢官儀

其二

暑退年年侍講帷  
秋來日日想朝儀  
金流膠折非疇昔  
鵠立鴈聯正及時  
漏待千門花作侶  
煙開雙闕月應知  
忽聞少海恩波渥  
即向文華拜赤墀

中秋前四日集維益朱榴館得殘字

秋色愁腸夜乍寒  
偶從省月一凭欄  
海潮白擁江門雪  
榴纍朱懸洞府丹  
林野總霑新雨露  
閭閻仍苦舊凋殘  
爽鳩此日春將半  
何得餘波動地歡

中秋集余望筠館時久坐方得月會逮稅使之

橫于楚者又逢聖誕志喜分得山字

坐看皎月出雲間  
豈爲扶陽力不慳  
頃刻陰翳消宇內  
普天光照徧人寰  
正逢湯沐生春色  
想見宮闈霽聖顏  
自是大明千萬世  
將呼嵩嶽壽南山

西臺滿考謝賜羊酒鈔錠

朱衣使者降從天  
下拜懽承雨露偏  
楮幣何緣分內帑  
綸音似欲赦前愆  
委蛇愧乏羔羊節  
醉酒深慚飽德篇  
不是作霖逢大旱  
投醪漫想古人賢



憂旱

炎劉何意說乾封  
雲罷今看舞燕從  
豈向桑林躬六事  
爭歌雲漢念三農  
目前生意憐芳草  
海內多愁望赤松  
聞道呂梁洪盡陸  
軍儲此日又難供

其二

西郊雲起也縱橫  
不分星河夜夜明  
近水園林何處綠  
向陽葵藿幾時傾  
豈因東海冤猶結  
可是弘羊烈未烹  
却憶吾皇曾步禱  
隨車膏雨徧生成

送萬伯修司馬之鎮薊遼

異邦振旅九重知，鎖鑰親提十萬師。  
對奕先籌肥水捷，請纓欲向幕南馳。  
輔京列鎮金湯在，屬國三韓保障宜。  
只恐材官生髀肉，翻嫌款塞望羈縻。

聞谷中橋成，先是以高僧福登力建萬佛塔募緣致畢，此工遠近賴之志喜。

懸空飛渡俯清流，爲倚慈航在上頭。  
題柱不勞歌蜀道，吹簫似已到揚州。  
綵虹斜向雙龍掛，紫氣高連二華浮。

欲濟巨川思大楫應知明主夢相求

送劉伯時之登州

相逢把酒共登臺  
悵別街情祖帳開  
已有甘棠留夢澤  
還須露冕向蓬萊  
郡齋閒共仙人卧  
睥睨平臨蜃氣來  
渤海于今歌出牧  
佩刀誰不讓君才

改予知兒和表生微之戊子下第所作時兒與  
生同試順天

涉世何妨共陸沉  
聊從林壑惜分陰  
任他按劍臨明月

羨爾懷珍有煉金江驛多梅春可寄池塘生草夢頻侵  
莫忘獻賦當年意狗監相逢聽好音

送朱左使歸衡州

雨雪青門供帳開千年疏傅兩賢哉即從山色憐花徑  
總是君恩到草萊灞上攀轅今日去衡陽歸鴈幾時來  
莫愁按劍風塵薄還為蒼生叱馭迴

送周光祿冊封晉藩歸省

近臣持節渡滹沱捧冊遙臨鷺嶺過故國重沾周雨露

新恩偏到晉山河分  
桐帝子宗藩盛負弩  
諸侯保障多  
明主不忘馳馬舊  
莫因歸省戀烟蘿

送祝將軍伯良之任吳淞并序  
伯良余同年宗

伯尚書即子敷子也少爲名諸生廬墓友諸  
弟余往在浙聞而嘉之頃就武推總吳淞爲

賦七言律勉之

承家綵筆雅能文  
仗劍東南欲豎勲  
卻殺詩書堪上將  
君陳孝友試中軍  
澄江波靜三吳月  
鎮海春回細柳雲

燕領登壇將萬里箕裘衛霍漢廷聞

秋日同董維益司寇蔡弘甫內翰集朱汝修保

御脩竹館得開字

杏林三徑雨餘開漫倚琅玕結伴來如向渭川成別業  
那逢燕市不銜杯黃庭經爲籠鵝寫綠筆吟看過雁裁  
只恐瘡痍仍滿目人人都望長桑回

次秋字

瘡痍入夢起邊愁又值蕭蕭落木稠何處征人驚雁影

誰家織婦望刀頭杯停河朔憂時日月照關山出戍秋  
為語請纓年少者風塵海上未曾休

送秦給事使齊

綸綍傳宣下掖垣遠持玉節過雲門夕郎暫輟芙蓉直  
公子遙霑雨露恩擁簪定餘從事醴攀條故倚帝城園  
淄青遺俗君應問何日函封上至尊

送賈德脩奉常使趙

容臺清曉登征車千里漳河入望初本為景風持使節

不同當日曳長裾韓陵山下還藏石紫陌宮中好購書  
帝子相逢應授簡賦成白雪寄雙魚

寄懷雄陽翟座師

清時何事拂衣迴咫尺門牆望眼開一自掄才稱國士  
遂令增價向金臺灌園戶外真羅雀結社花前共舉杯  
他日經過聞鯉對春風滿座尚徘徊

張羽王言別得分字

度刀把贈倍慙慙暫合延津袂欲分休向風塵愁按劍



且從杯酒細論文鶯花日下同爲客常孟風流已到君  
狗監若逢楊得意賦成蚤上漢廷聞

送秦二使君之蜀

一麾十載悵離群乍晤那堪落葉分重以神羊臨絕域  
幾呼綠蟻對斜曛草堂莫問悲秋賦劔閣應傳諭蜀文  
此日西南射虎甚除苛萬里喜逢君

寄題葵園

沁園春色蓋傾初日涉因成趣有餘排闥青來山崕岼

當軒碧擁樹扶疎忘機迹與鷗相狎  
衛足心仍藿共舒  
况是侯王同姓者何如藜杖夜讎書

宜川謝劉伯明年兄賻吊晤其弟叔貞

不忘高義臭如蘭跋涉那知行路難  
座對西銘堪論道  
尊開北海且加飡知君有意搏鵬翮  
老我何妨戴鶻冠  
他日看花遊上苑佇逢春色滿長安

其二

從來意氣重金蘭投轄多情況二難  
乘興不因雪夜盡

銜杯還併月華餐書成已貴雒陽紙賦就應彈貢禹冠  
伯仲絕爲廊廟器吾將垂釣老江干

宜川謁劉太公墓有感

遊燕杖屨趨承日過里低徊想像時我愧延陵將掛劍  
誰憐有道爲題碑心灰孟瀉千行泪手澤腸迴一局碁  
極目松楸兩地隔不堪霜露繫吾思

送辛甥省親兼示諸甥

愛子趨庭共藁砧又逢佳節酒齊斟杯從河朔花爭燦

腹坦琅玕月正臨敢謂家傳同鯉對蚤將文價重雞林  
老夫塵外消長晝爾輩窓前惜寸陰

贈安肅鄭公

興來曾泛剡溪航置驛何須羨鄭莊眼為金蘭青似染  
髮同海鶴白於霜看君合用安車召念我終將小草藏  
推轂未能羞獻納臨風先寄紫霞觴

次汝脩觀梅

帝里梅花向日紅巡簷不與少陵同已分上苑枝頭月

肯逐高樓笛裡風，醉後共憐西圃盛。  
賦成誰似廣平工，九重正想調羹手。  
莫道商岩有傅公。

丙午上元西社觀燈登城樓次日橋上看龍燈

同孔治甫暨薛龍阜胡含素梁君旭來陽伯  
馭仲家弟希孔得同字

村社招邀少長同，正逢皎月滿晴空。  
欲從雉堞游天外，如睹鰲山在禁中。  
不夜城連南北合，長春花入綺羅叢。  
橋成燦爛龍爭躍，鼓鬣雙雙戲彩虹。

送李次溪制臺奉召入理京營

仗鉞西征十二年，歸朝丹詔降從天。  
開疆勝畧虛韓范，繫頸威名紀簡編。  
寵渥三朝沾鳳闕，姓名萬里勒燕然。  
猶龍卽向渟沱渡，還有函關紫氣連。

其二

原是當朝矍鑠翁，治兵今向帝城中。  
新兼節制仍司馬，舊領嫖姚盡總戎。  
刁斗風清山海北，旌旗日煖羽林東。  
高牙坐鎮烽烟息，爭看麒麟第一功。

其三

十載旌麾獨鎮西  
論功不止魏公齊  
疆開千里生春色  
波及三秦淨鼓鼙  
延世緹騎星拱極  
荷天雨露鳳銜泥  
几几赤舄歸朝去  
無奈攀轅父老啼

其四

陞見勲臣至自西  
禁兵十萬許誰提  
中軍上佐兼南北  
一代元戎肅鼓鼙  
飛蓋首回二華遠  
登仙旌入五雲齊  
已知司馬屬人望  
應築長安拜相隄

潘伯王道服張憲周枉過草廬

老我歸來學種瓜，干旄今到故人家。  
剡溪不盡王猷興，渭水何勞博望槎。  
久借甘棠臨綠野，相逢投轄對黃花。  
欲爲十日平原飲，忽漫車塵望漸賒。

七夕同董惟益司寇蔡弘甫薛魯叔二太史集  
朱汝脩保御脩竹館分得身字

烏鵲橋成玉露新，雙星久雨阻通津。  
河邊似作參商侶，機上空憐寂寞春。  
隨俗曝褌聊復爾，穿針補袞是何人。



又聞思婦深閨語不及連枝嘆此身

仲春陪祀先師

太牢遺薦陋溪毛  
窺見宮牆數仞高  
節歷中和方月魄  
樂成金玉儼雲璈  
獲麟千載傷吾道  
歌鳳當時入楚騷  
此日辟雍爭北面  
憂時何必目頻蒿

過保定許貞甫侍御墓見其二子

秋色蕭蕭向晚寒  
誰家吹笛傍征鞍  
子猷雪夜空乘興  
玄度風流也蓋棺  
野外月明馳馬第  
冢邊烟鎖釣魚灘

相思十載平原飲此日松楸對二難

送王將軍北征

幾年坐鎮海波平忽聽驪譟送北征  
百隊熊羆攀祖帳一時笳吹動江城  
營前細柳那堪折匣底芙蓉若自鳴  
共說承家多節操佇看塞北請長纓

贈張甥

南臺舊業擅名流接武英賢欲奮脩  
芹舍仰瞻牆數仞桂輪輝映月中秋  
卽看綵筆追秦漢定有青萍射斗牛

好共兒曹勤努力吾將簞笠狎群鷗

送馬叔遇馬千里盧敬之周汝信張學魯李國

柱王薰伯胡頤玄張聚五張孺克陳維則安

曰儒諸孝廉偕計

雪齋銜杯傍早梅誰能不羨百花魁上林已就相如賦  
駿骨將逢郭隗臺三策獻餘春宴渥五雲深處杏園開  
玉宸卽有賢臣頌鳳起丹山蟄起雷

送文仲子應舉

交游三世似金蘭此日箕裘數二難  
衣鉢承家仍舊武鵲鷁比翼向長安  
逢時桃李花呈寶奔月嫦娥桂遇丹  
上苑醉餘齊許國老夫不復夢邯鄲

以陰芍藥不開望隴有感

紅藥含芳慘不開  
况逢陰雨助人哀  
欲投綵筆詩全廢  
漫倚雕欄首重迴  
荒塚望爲雲裏舍  
斑衣翻作夢中萊  
一尊彷彿承歡日  
又聽啼烏淚滿顙

送來陽伯常脩之薛允執高大克石復朴偕計

塔寺重新帶映虹題名曾報五人同秋深桂闕輪爭綵  
春暖桃花浪欲紅行見成龍爲雲雨應歌鳴鳳集梧桐  
重令百二山河重肯負周王棧樸功

溫恭毅集卷二十二

欽定四庫全書

溫恭毅集卷二十三

明 溫純 撰

五言絕句

老僧巖

獨向中峰立  
洪荒直到今  
如何身不動  
為悟石頭心

其二

色相空山裏  
無言亘古今  
嵩山面壁者  
還有去來心

移居宣武街庭前有奇石四各題以名維益汝  
脩弘甫欣然賦詩余亦各得一首

立禪僧

止錫天臺似天臺有老僧巖石頭今已矣九年少室山面壁亦

暫耳

二巖峰

我有五畝園當簷二巖峙山靈似有情不約忽來此

邀月巖

云何安樂窩從窟手探月爲悟生生機天根于此發

化石嶺

寧知木匪石又知石匪心不二者誰子忘言亘古今

浮光八詠

浮光在信陽之東予嘗歷其地

戈山

鬱律鄰嵩少仙人遺舊跡蒼翠薄青霄烟霞爛白石

淮水

東望長淮水宛如渭水清空明天一色亦可濯吾纓



春申宅

昔日春申宅今時絳節宮  
人事今時異風烟昔日同

霸臺

蕭王古霸臺野曠望何極  
月夜楚歌寒草木無顏色

七里泉

熒碧小龍湫鬱葱騰佳氣  
獨有洗心人一軟知清味

五龍宮

風俗存三戶雲縈寄五龍  
有年書太史無事憶乾封

劉墓

叅軍玩世者醉德不醉名天地餘杯土古今誦達生

聚仙閣

小閣何岩堯霏嵐如動色杖策問筌蹄丹梯不可即

過呂公祠

行役紅塵裏仙跡古道傍七年渾是夢不必問黃梁

溫恭毅集卷二十三

欽定四庫全書

溫恭毅集卷二十四

明溫純撰

七言絕句

望溫嶺溫泉

極目看山日望雲  
佳山欲與白雲分  
老僧笑指東頭嶺  
原是溫名本屬君

其二

把酒探奇坐紫巖溫泉溫嶺望中兼二名偶合相傳久  
添我何妨共作三

同官姜女遮騎山

山靈亦爲婦人哀半路能令追騎迴何似愚公長障塞  
免教骸骨盡成灰

送遠卿之幕滇藩

不辭小草向承明從吏多君過渭城渭樹江雲憐日莫  
忍看萬里又西行

其二

萬里風烟六詔生  
壯遊莫聽鷓鴣聲  
行行即見薇垣紫  
綵筆還看賦遠征

郊望

盡日奔忙半日間  
羞將塵眼對青山  
山頭似有樓雲室  
欲向山靈借半間

山行

冒雨登山望眼舒  
翠微山色擁征車  
只看足底烟雲合

便是洪荒太古初

題銅雀臺有感效陸放翁沈園之作

漠漠烟籠銅雀臺幾年幽思若爲裁  
臨流不敢開塵眼怕見波涵隻影哀

送左金部夏伯之河西務

花底青樽爲爾攜相看薊北與河西  
不堪孤邸仍分袂醉聽驪歌月影低

憶弟

幾年作客向幽燕  
白日看雲學杜眠  
欲醉濁醪消旅況  
又逢一鴈過尊前

送唐山人歸關中

西風裊裊悵離情  
千里關山月獨明  
若到遊巖棲隱處  
當年泉石與誰盟

靜業禪林

寶地塵踪結侶過  
青蓮白馬定如何  
開門忽見池中月  
說到圓空語亦多



其二

說法珠林對月華  
蒲團小坐即爲家  
池邊賸有蓮千朵  
可似當年火裏花

遁園觀物堂成

終南爲案華爲屏  
雲滿疎林鶴滿汀  
物外不嫌出郭近  
却來似是醉人醒

初秋同社友集井園

鬱蒸暑氣未全收  
虛聽蟬聲樹裏秋  
把酒仍爲河朔飲


醉餘散髮更臨流

宜君孟姜女列泉

匹婦何緣有列泉只因一念徹蒼玄世人誰解綱常重  
流得芳名萬古傳

說經堂別子成蕪訂峨山之遊

遊罷終南興未央憐君獨住遠公房嵯峨有約休相負  
恐惹山靈笑我忙



溫恭毅集卷二十四

欽定四庫全書

集部

溫恭毅集卷二十五至  
七

詳校官監察御史<sub>臣</sub>周元良

覆校官中書<sub>臣</sub>王慶長

校對官中書<sub>臣</sub>李荃

謄錄監生<sub>臣</sub>謝大倫

欽定四庫全書

溫恭毅集卷二十五

明 溫純 撰

尺牘

報陳行菴

警報日急諸酋形情露矣整兵阻隘責在分守隨酋向  
往就急赴援則門下所習諳者蓋酋計不測既欲分我  
之力以故東西調援非臨時早得其情恐不免顧此失

彼且受敵之處自四海治至了角山相去遼渺旦夕之間定有真情拱聽教音再圖經畫

寄李漸菴

欲卧山中意最真既過雖以遣人繳節涉慢命故冒昧入京不謂遽有兵燹之寄令不得告圖書衣裳又不在身所客居隻影安能鬱鬱久居此哉人便附候華山之約不遂得一俚語在別紙倘至蓮花玉井願為我寄山靈不必作移文也

答方金湖

雲中實京師右肩勢孤卒悍稱難守有日邇奸民盤據  
坂升患不在外敵下賴經畧令北門有鎖鑰之固即目  
前虛警當無煩宵旰純濫寄兵筦幸與邊計所藉以脫  
曠職之罪不淺矣

答陳行菴

節據塘報倭酋必入犯無疑馬帥卞懷仁相機應援誠  
得策而天城迤東平敵迤西在宣山二帥雖非本地倘

臨時力可赴援不得襲故套坐視也郭帥駐劄寧武與偏老孰便幸裁之

報郭總兵

去歲京中幸一面未幾偕晉中深為三關稱慶近邊報日急諸酋形情已露雖聲言擊大同恐犯偏老意更多所賴揚威樹勲不淺矣書中謙引大過僕嘗謂大將統三軍至今體貌與諸將等無怪乎紀律不可振也往周渭陽公鎮雲中不折節於人卒成名將僕以為得大將



體者一涓陽耳願將軍效之

報譚二華總督

節睹經畧未嘗不嘆羨謂為天子守封疆皆得如門下  
北何有強敵南何有倭夷純不諳軍國大計顧見當事  
者襲套文則諧衆口實幹濟則多沮撓今篤中不欺視  
公家如私無有若門下者建臺之議即勞民可遺永利  
寬恤休養之計久欲進言於門下而門下已調停之矣  
諸酋近擾雲谷置薊遼不言此其計甚詭恐秋風至彼

所垂涎不在彼而在此也

報翁見海

中原之地在食不在兵在吏不在將純竊以為確論故  
郡得一龔遂則渤海成賣劍之風即藩臬即撫按皆屬  
贅員惟龔套逢迎真有如來諭者以故地方一遭水旱  
即皇皇思亂緩急標本之計非兵權未可彈壓又參將  
改駐不繫增設兵果不足亦止取各道軍餘民壯耳是  
在今日不為聚而於他日亦無難散也往師劉二巨寇

流劫中原燕趙驅則入齊魯齊魯驅則入徐鳳正苦各  
省直兵無統屬耳武德諸道即欲如來諭然須題明方  
可入勅書幸門下酌之

報譚二華論邊事

承諭召募之難仰見當事苦心大都募兵之難難在本  
鎮入衛之難難在他鎮圖經久則客兵不若土兵論緩  
急則土兵之補練無期而客兵之見在足恃況計費又  
有如來諭者愚為此慮最久嘗謂入衛之兵可暫而不

可常可罷而不可遽罷以故待罪以來未敢以此撓邊計豈不知各鎮亦以薊鎮所關繫尤重耳蒙教敢不仰成雅意力贊廟謨第優恤寬假一切脩築之勞得永免使薊鎮為客兵樂土何如

報王鑑川中丞

籌邊二疏諸薦紳無不嘆服至有恨宣大得門下晚者南山之議今且撤迴入衛兵數千奈薊鎮補練無期勢難盡歸使山陝之兵日困一日不知作何終耳

報殷石汀

猺獐之酋蔓延於積習而養成於玩撫蓋撫在我剿亦在我則剿可也撫亦可也因其不能勝而為不得已之撫則撫以示弱雄悍逆賊以殺鹵蒙惠孱弱赤子竟寬抑莫伸賊如之何不愈肆以邀賞而東南之民何時就衽席也承諭剿撫並用而請餉振威又奪其氣自是相機運用以成底定之功在門下耳

報王鑑川

那吉之降視呼韓款塞不同蓋呼韓以君長來那吉一小豎子耳於中國無輕重今既入雲中殺不武縱則示弱苟擒叛賊為我立功即效歸亦庶幾哉但續降者真偽未分倘率衆聲言那吉部落陰為內應計恐萬萬無容留理也

其二

俺酋既哀求那吉此機會不可失蓋彼酋棄而不顧則我不過得一囚耳但率然輕予未免褻體必果有哀懇

實情令彼殺諸逆為我立功則予奪之權在我彼當亦  
自感服僕已疏請大端謂彼既哀求自當議處而尚有  
謂不可與者不知既哀求而不處假令彼以為哀求不  
可得發恨棄之而去不惟因一降重受其禍且令彼執  
索降之名擾我而我又兼此哀懇之機而失之矣幸早  
圖之

報見松劉中丞

默國事詳前書中臨安參將本以尾大故默寓防微之

計頃議裁革真屬無謂讀大疏仰謀國忠懇所云五利  
令西南機宜宛在目前建議者蚤得聞此當無勞更張  
為也廟議一一如諭他日滇中軍民安享彈壓之休該  
鎮得免震主之嫌者在此舉耳

與陸五臺太宰

都下日接聲欵十餘年神交夢想者遽承公忘年之雅  
不知何所投於翁而翁即傾蓋如故若此也日公發都  
時追送不及無何純亦得告而歸蓋自分迂疎無補徒



竊祿增懷又老父衰白多嗽幸歸來日娛膝前課子  
弟讀書耕田有時過漸菴丈所相與質對倘自此收斂  
精神不負心知之教庶歸來不為徒矣天象示變往吳  
越水旱驗矣今其驗當在何事乎有懷種種不能悉

與李翼軒督學

都下一再瞻對已即萍梗然得所論著及錫類秦中章  
程不啻親承謦欬又獲珍篇獎借逾分益已心感高義  
顧以李下之嫌未通名姓歸來苦途中述遭至今月初

始抵廬而先是承溫札豐廩宣迹未密而情若膠漆耶  
勒狀上謝書成得令弟飛騰信快之

其二

門下陶鑄秦士庶幾還周秦之舊矣意即內召啓沃燮  
理而猶以藩翰相煩聞分部嵩雒嵩雒固昔賢分陝地  
世所傳甘棠猶在何幸於門下再見且知以此為重用  
地耳頃勞干旄枉過蓬華以未致款為歉

答張濂濱中丞

人自蜀中至者道門下鎮蜀無何即為蜀畫便利而以  
禮易舊俗尤叩符諸國對症之劑即文翁化蜀昌多讓  
焉去歲冬仲天奪我糟糠之配已又奪一婿蓋積謗一  
免官不足贖也純以此過痛心怵怵病矣

與弟

河兄來量與阿堵中物蓋吾家親支人少縱不才也當  
看顧今日雖有親疎此是祖宗骨血范文正公所謂自  
祖視之此一人之身也近世人於一家骨肉常分形骸

欲望作官仁民愛物難矣我輩此處正當體會正是學問

其二

何達軒忽有此變使我未遂薦賢之心遂託按君給符以歸而聘儀則致之家耳天不佑善至此吾三疏不遂時將大計只得少緩此番事體萬分掣肘只好於公中加一恕以求妥以保全善類而平生作對者不可不置之人情世態之難處如此

其三

家事心事俱詳書中矣吾弟家居守拙甘淡泊我心甚  
喜且吾弟居恒能亮我若他日令其子獨富而弟獨薄  
則天地間之最不孝人矣是視父之子不如己之子也  
晁家村水田覓十餘畝鑿一園久已無心仕路矣須近  
水可度日也

其四

吾弟拜命亦祖父餘廕所及所謂前種而今食之食之

而又種之則後之食者將繩繩無已且職任亦甚難須  
慎之又慎勿存一毫身家之念上為國家下為軍民始  
不負吾家世受國恩圖報夙心孫立山親家一推疏上  
上大喜即令守票速發行蓋數年未有之特恩也衆正  
大快皇上此舉會孫親家力勸登程為聖恩為時事不  
可專為已也

其五

吾弟想旦夕即發而入漢南矣百凡慎之又慎吾弟有

識有量必不以此自足為國為民可也遣去賀文乃善造火器者吾弟善視之

其六

人道漢中軍民甚感吾弟吾甚喜須如此乃不負朝廷蓋今正小民在水火之時吾輩縉紳實心挽回安望天下無事若有事此身且不知何歸況其家乎今之不思恤軍愛民者真愚之甚矣望吾弟千萬堅持此心不但自成一美名且為子孫造無窮福澤也

其七

弟痰未愈須用定心之功凡去留遲速順之而已當不得意此心先亂若逢有大變將如之何張魏公有刺客至亦笑而聽其取首無非信命信數也二姪文各有致正好從此精進令看好文求英發也

其八

吾弟脇下疾何又發且甚也據弟書及來人皆言已好猶不敢信甚慮詢之京中無良醫止彰德高醫官在此



渠云可治遂給路費脚力令來家省脈從容調治想須  
久治方可大愈

其九

火器曾令朱騰淵來面告亦盡其技否近阮州成功曾  
以宣鎮送來數件付宋大斌帶去其威遠砲一入巢衆  
即大驚而潰故我兵盡入此一效也或川中攘功或不  
肯歸阮州亦未必肯說出大斌耳然足以徵此技之可  
用矣利器解四冊附致

其十

李瞻字公祖至極稱弟才守當為干城第一真不負朝廷不負期許方是宇宙間大丈夫也自携費用倘或不足我當助之惟愛恤軍士使一方感戴使去後有餘思即一時有相左者亦當愧於心也我事體外面已大明有南部郎劉元珍一疏可為此局斷案不可謂世無人也錢子狂言至四殊可笑耳

溫恭毅集卷二十五

欽定四庫全書

溫恭毅集卷二十六

明 溫純 撰

尺牘

與申瑤泉相國條議撫浙事宜

入浙未幾疆事安敢冒言顧察輿論有一二關切大者  
敬陳其槩一織造新增每歲浙局約用銀六萬兩前留  
事例今歲猶不滿三萬過此愈少非戶工二部破格存

留恐難濟事蓋浙自用兵以來且四十年養兵之費  
未已閭閻以此稱困即逋負嚴徵能完亦僅足兵餉耳  
司府那移日久抵還無期今且無銀可那矣一大將舊  
駐定海為定海為倭夷入犯之衝又南可以援溫台也  
近議移駐會城會城兵僅三千定海萬有五千舍多就  
少已非體又會城有兩遊擊及諸總哨又移一總兵即  
總兵亦不樂居省城以交際之費十倍定海也先是有  
各院不欲總兵駐省之說實非通論但題允未久輒難

議改俟求妥當請裁一兌運在江以南之民稱改折若稍減每石五六錢即兩平不惟便民亦便國蓋太倉米可足八年然大半紅腐每年支不過二百餘萬石若半改年可得銀百餘萬即多減一二錢較之米猶有實用俟年大豐再議全運本色未晚也惟尊裁

其二

浙中方面海道重次清軍杭嚴與溫處兵巡此四道得人則浙之安攘大計過半而前日兵民繼聞之事可預

銷矣海道駐定海定海為倭夷入犯要害所轄兵士萬餘一失機宜即毫釐千里葉憲使夢熊八面才也軍民一口歸頌切欲加銜久任為地方計忽調永平或居來意也前調顧憲使去今再調葉憲使去塞事誠急謂海防何純嘗念任法不如任人故今叨撫浙謂莫如求廟堂為東南大省擇司道府正其州縣正與諸佐貳純可自行激勸有不簡與飭之不悛者可不時論罷或徑逮究大要以分別淑慝為主若一切之法可行於此或不

可行於彼無益也葉憲使尚可留借一二年容疏請加  
銜清軍杭嚴二道內有資俸稍深者倘遷轉願推擇通  
明有識者代之廣中兵變降一憲臣罷一郡守不令紀  
綱難振且益驕兵士恣睢心乎前浙中失事各官降斥  
太多方為此計欲擇其中才行可者稍加優叙以辨冠  
履蜀中差官逮有司法也第舉大事如各省修河築城  
名雖動官銀其實民自陪補甚多即今採木亦未必各  
官盡入已也且近日駕帖差人稍多不可不防其漸惟

門下調和至懇

其三

通判姜奇方高品實政巡鹽詹直指與奇方繼令宣城  
談奇方治宣城狀不類俗吏今倅杭大類宣城不佞往  
往見民願就奇方對簿者千百人一口及令鞫審無不  
曲盡民情詰其左遷之故則以直犯鄉里先達尤足多  
也杭為省會地總捕同知責任匪輕若不得人則民間  
之易動難安者猶如故故願以奇方代喻均無非為地



方計懼具題瑣瀆聖聽且用人乃主爵者事不宜從外  
越俎惟借一言

其四

運船缺料敢請漕糧量改因近年米賤大為農困若銀  
數仍如例行糧仍徵解於民情大不便故先是江南士  
民紛紛必欲本色為此也今議減銀數免行糧而折銀  
正數之外仍有火耗高稱之費實祇得其平乃太倉積  
此可用銀於國計稍補且令賦繁役重之鄉可省目

前造舟之費山僻三縣米數不多倘得歲免糧運為幸  
至於改折臨時酌請之議乃為倉米僅可蓄五六年過  
此則腐爛無用其隨時定價非徒便小民如是而後改  
折之法可常行耳

其五

盧參將蒙允留地方幸甚蓋人之才固有宜於彼而不  
宜於此者若止為官計而不為地方計或遷就姑用於  
平日而倉卒更置於臨時均非勝算且武職任使有二

都司與腹裏守備可用其廉謹者邊海之將廉謹要矣  
更以威信服衆臨陣敢戰為主惟門下裁焉今歲大汛  
已過海波不驚純已歸而入武林矣近國是甫定忽新  
舊言者又相攻擊不多事乎惟潛消默化使國體不傷  
正人得安其位幸甚

其六

浙省漕糧奉旨改折三分緣未減價銀恐驟行小民不  
便行有司查審通融酌派而民之產米寡者水次遠者

以得減行糧亦頗願折總計三分八釐四毫較戶部原題改折五分之數尚少但行糧前題止免改折三分今多折之數併祈一體免徵以廣皇仁坐派賞段原分十運一年一運先已解過五運有零應十六年起織今內庫併催六運至十運限八月內完浙省連年織造庫藏空虛前雖荷蒙聖恩減織袍服乃所留三年存留錢糧內多蠲免難以湊織賞段况前解段價尚未完給民已汹汹赴訴再難強民代辦不得已請寬限議留事例其

詳具疏揭中

其七

浙省營兵東西九總軍兵一總自兵民變後添設軍兵一總五百四十二員名歲用銀三千餘兩每出汛加給九總官兵坐糧三月銀一千七百餘兩又添北關水兵三百四十三員名歲用餉銀三千六百餘兩而先年為省糧計每什定以八名夫大勢多則糧餉難繼本什少則行伍單弱均屬不便純於去年出汛時查坐糧係額

外新加當即盡草近於春初趁數補之時稍稍汰去老弱共去二總實得民兵七總軍兵一總仍以十人為什即以二總之兵補各總之缺更有餘令食糧候缺一則歲可省銀五千一則兵不增而行伍免於單弱自是糧餉可繼在上不復存兵多之慮衆志安定在下無復懷減兵之疑蓋就人情而為之無大更張向煩廟堂南顧今已安妥附聞

其八

王總兵化熙明達有執不獨廉介海上兵士甚德之今  
左遷無非為海防計第恐廉者稍抑則不廉者且藉口  
益肆而廉者亦觀望灰心大都選將重才不得已之談  
也重才又重其才而廉者乃可不然剝削成風請託有  
效武事終無時可振化熙有恥可用人也倘蒙蚤補以  
風勵武弁亦馭將之一機也

與許穎陽相國

屢睹大疏求退或避政府皆同鄉之嫌為讓位計忘已

忘人有道之見自遠恐帝眷方隆同心共濟如三公為近世所未睹似不必因小嫌而妨大計無已則更引一位如龍江丈者未為不可

其二

北方久旱民不聊生恐有他虞頃滕少松留百萬漕糧之請未及處補京邊糧餉且百萬太多宜該部之難於允而格其說也思之今歲災傷為百年来所未有非破格不可太倉太僕銀尚可借若借三十萬金俟豐收給



京軍則二庫所損無幾而軍得一月銀足抵三月之糧  
蓋倉米一石直不及二錢而多得至五錢是便於軍一  
也三十萬銀應兌留六十萬米於臨德二倉使二三月  
賑民則此六十萬石新米可抵舊米二百萬石而米價  
可減所活必多是便於民二也無處而坐待其民流離  
恐奸民鼓煽而起即用兵撲滅所費豈止三十萬若先  
是以此繫人心則費省民安且正米既留二倉各官軍  
所帶私米亦必市於其地而得厚價是便於公司與運

糧官軍三也有此三便望請御札施行

其三

織造蒙聖恩減三之一又允留錢糧外吏舉手加額頌  
主上恤民至意即古堯舜不過然非門下默贊恐部院  
之言未必能動上聽純等當與江南父老感念刻骨不  
忘獨保留盧述原非曲循部曲意前兌嶠為龐溟在本  
鄉不便故欲與述相調而述則江西人也今溟未調而  
述調矣純上疏借軍士言以見公論不謂反蒙見疑前

部中以居來意留朱先或今不可又以純言留述耳然區區實為地方計也

與王荆石相國

聞門下必欲去國念時事有大可慮者恐後生因識行藏古人當事有不得已而默又有不得已而愚者其識遠甚且去國不難難於匡時惟圖其難者

其二

頃以愚默之說進蓋念三子反覆誠可恨而始亦有以

激之幸天祚國以山陵事敗不然雖百口亦難為詞易之失言決小人之道甚詳其曰健而悅決而和言可去則揚于王庭決之而已不可則寧悅而和必不自疎令小人以密防我中我以誤國家大計也故孔子以愚為不可及中庸之默從德性問學來偶追念往事為謬悠說然不異布鼓雷門矣

與楊二山太宰

頃者以翁推轂起家數月中再遷使當兩浙重地於涯

分踰矣拜違為內子醫藥稽程月餘始抵里無何即發而南於至後入疆受事睹閭閻非曩所稱吳越守藏吏為織造大害國計民瘼欲兩利難矣獨節費時徵奏留為今日不容已自分力恐未能然業已在事曷可辭得習水土將畢力圖之以副知己之望然所仰藉廟堂指迷至殷在燕辱督教臨發又辱雅贐於心不能忘附候興居所欲請者圖專布焉

其二

喜國是已定議論或從此可息然願當國衆老休休藏  
納默佐大化為幸純沿途傍觀吏治大都以府太守為  
重太守得人各屬無不嚴憚砥礪故欲民安擇撫臣尚  
矣其次莫如擇太守太守有缺似未可循資序遷為也  
不佞叨撫臣甚懼或無益於地方倘各府缺守幸念浙  
為海內大省遴選名流為一方重即不佞亦可藉以補  
塞惟尊裁

與凌二洲

從邸報見大疏齒及僕若以為可久於任夫久任撫臣  
真省事息民一要計即僕始願亦若此第積戾無補竊  
甚慚恐為大方厭如昔人所云推不去者而門下直請  
留於朝不益增僕慚而重為大方累又為門下知人之  
明累乎倘主上自是擇賢者而久之即僕以不職去而  
門下為德於桑梓者宏矣

答劉少嵐太守

日聞借總轡事益當塗方急國計故為官推擇如此即

不然苟可宣力何論要散彼以要散論者淺乎覩矣當塗類有識肯以此待兄兄有識肯以此意當塗而薄一中大夫耶齊魯巘事甚簡一中材足辦而用一積勞良二千石是以烏獲而舉鴻毛不謬哉然就近遷拜省輪蹄之勞或亦體恤行役者之便計也

與趙麟陽議從祀

讀翁議江陵疏令法紀國體兩全讀議陳王二先生從祀疏令超詣心得之旨曉然於世乃一二君子亦有異



同何也大都從祀有宗傳羽翼兩者諸君子不思耳宗傳尚矣羽翼不必道脈即篤行博學亦可與於俎豆之末況二先生耶惟翁力持之其說自定

寄閣部諸公論西夏功

西夏以困成功不待覈勘可知督臣又激聖怒意聖明以此激勵東征將士耳第督臣老矣倘一旦不勝苦楚而死即令共事者獨受上賞徒啓後日紛紛之議亦非所以覈功實而慎賞罰也蓋督臣所以不急入者以諸

逆旣戕撫道有不可宥之罪非如回紇疑畏土番以郭  
令公助攻為喜故令公可單騎往也假令以兵入逆方  
為收堡計而不能拒且誘以質如張傑乎西夏城但可  
困欲困必先復衆堡以剪其翼而絕敵人往來之路翼  
剪矣路絕矣又兩戰大勝打死哮雲以挫其銳迄事平  
不敢更出城一戰為遊釜之魚然後一意防敵困城抵  
秋深則敵之氣衰而城不攻自潰可知督臣力能辦而  
言不足令其料中矣亦可以為深謀遠慮者式而戒輕

率喪師者而或猶短其無才過矣大率西夏之功當以復城堡及城外兩戰為首假令堡不復銳氣不挫噀雲不死則逆與敵一家矣我兵雖欲渡河而西亦難且八月以前外憂強敵內憂師老危可知已八月以後城困敵退卧俟之耳若不揣其本而齊其末或難以服遠近之心督臣之品之識古今希有惟憐豁回天亦國家程功覈實惜才勵世一大機也

寄政府

東警宜更遣舊官各邊者經畧遼事如巡撫未至可別  
用即令兼管尤專而以李寧遠佐之輕車熟路可恃前  
遣止經畧山海以西戰將速調西人屢經戰如王通麻  
貴徐隆蕭如蕙輩使各帶軍丁千餘援薊永全用三連  
火器必易成功勝一時烏合遠矣但西夏之勞或未盡  
酬非先厚賚無以服其心而鼓其氣如遠不可即至先  
調王保而以他將代之何如

寄政府

從報知朝鮮戮倭千餘燒船百餘死可數千時天寒倭  
不慣經又衣薄不利一也食盡無可搶必饑不利二也  
倭以毀王墓激朝鮮人之忿朝鮮方乘勝知所以破倭  
矣不利三也倭之北也空數十國強之以行已有思反  
者今聞敗必堅其始謀闕白且不免不利四也今其發  
兵助陣時矣西兵入衛三千既留各給犒賞銀三四兩  
以鼓其氣仍令祖承訓帶遼兵令渡鴨綠於二三十里  
內分三道為常山蛇陣以進仍先遣牌使朝鮮辦十許

萬軍馬芻糧同朝鮮兵環而攻之必大勝此聲一布或不待我兵至而倭盡戮於朝鮮矣倭一敗百敗我一勝百勝時乎時乎不可失也

寄政府

西夏功成告廟獻俘大慶也華夷觀望從諸大夫疏請聖駕昔石州破穆宗於講筵下問徐文貞公曰石州如何破了此言一出四海歡頌今方禦倭皇上一舉玉趾其鼓舞將士勝於賞亦勝於鈇鉞惟贊成

寄部科救魏確菴

聞逮總督遠近驚訝總督為一代忠良今且老矣何能  
勝此苦楚初所慮者恐與敵合而入據內地也今深秋  
事機已過敵難再入即寧賊未擒而已如遊釜之魚不  
足慮矣旦夕論功奪我大帥以快逆心可乎昨交代時  
官軍哭聲動地擁留不放今再聞逮不知作何景象萬  
一更有他虞將來事勢愈難措手此可想而知也寧城  
可困不可攻攻之徒損我將士困之為填路入城之計

或不待水入城而賊可得也宣大兵急應放回事完分別論功稍增犒賞秦人之氣自倍時有大捷天顏必霽行伍之情攻戰之機或有出於傳聞陳秦之外者惟蚤為暴白使目前軍心早定使熙朝賞罰功罪不爽又使反側不復藉口

其二

報中云魏某已有旨豈曾有旨已宥或仍不欲宥耶此用兵大機括所關繫非止人才可惜也正用兵西逮一



督臣東逮一將官徒使我將士撓亂無暇他圖而敵人則大快矣會議叙事體仍叙其功乃可自督臣入任甫一年報首獲級八百餘為各鎮所無功一也寧逆分據城堡四十餘羽翼已成不數日盡復擒其偽將使今日得行其困城之計而敵與逆不便渾合功二也敵大舉以搗巢使其內顧速回而我城堡無一失功三也先是固原甘榆軍皆思變自督臣至遂改慮功四也賊兩出迎戰皆大敗死數千噓雲勇冠寧鎮一死而諸逆喪氣

不敢更言戰功五也秦邊腹軍民戴督撫如父母而乃以罪奪矣旦夕論功將舍主帥而專歸所部與後之人乎知督臣至聖明必宥且叙功恐老臣一旦成疾而不忍言者悔將何及此國家大政也此鼓舞各邊督撫一機宜也主上一不允則再疏再不允則三疏四疏未為煩瀆惟鼎力倡之想得寧夏人心者有戴忠齋名光啓先為會寧令為兵科都閱西邊又為寧夏道明達出類止因會試取中舊輔之子遂廢夫以此曖昧之過棄不可

得之才宜乎有乏才之嘆也若蚤補秦中為他日督撫地不患無良督撫矣姚又軒入關云寧城可困不可攻是到家之談蒞任次日即赴邊畧無難色士民即相對喜曰若此則地方安矣然猶有短其才者何也

報王懷棘總督

雲谷間壯猷亦耳其畧得佳刻亟流覽始詳收史夷裁歲賞揚威治內及諸鎮利恩利威如射中的夫恩人爭言之誰齒及威即秦塞年來用威亦多利益塞上行間

終不可積弛積玩今日弱一日不可復振也惟萬全必勝之計非多算深謀不得又非真有為國為疆場之心亦不得令門下其人也幸晉樞筦會東征所賴石畫不淺聞大將有專恃批擣鄙火攻者即勝亦互有得失況得不償失蓋不知以守為戰也守惟以弩為城以連砲為地雷即遠征亦步步不忘守百戰百勝無踰此曾為里人趙鎮撫世登籌之業見收于司馬門幸勿以年稍長而忽之也杞人在林下不能已之懷如此

寄李漸菴總憲

寧夏君軍民怨恨已極京中不知何也如冒濫又不及  
必須以南大理處之蓋此地為前兩君已壞而此君又  
甚之不可不急救此一方也

與沈蛟門宗伯

當寧以翁執秩為爰立地乃一時共事為楊李二公識  
者以為翁與二公皆今所稱名賢大君子也相與持衡  
稱量海內人才拔茅夙覓化枉為直惟此時然矣純受

事大方計惟察別官屬使各舉職為兢兢然為官擇人  
就近隨宜使官與地相安則亦惟是持衡者之力是賴  
疆事詳揭中惟委照

與張心齋

往魏確老道翁事母篤孝私竊高之乃終身之慕如此  
即古所稱閔損王祥奚多焉獨國家倚翁為柱石恐難  
徑情而去幸念主上眷留之意少已山林之興為僕等  
外藩張仲浙兵士不難鎮定王總戎清操偉度大服行

伍當前官狼狽後殫力振作為一方裨益不淺將官中  
如此者有幾區區禮貌已為處分妥當決不令失大將  
體亦無非為地方計也

與楊晴川大司農

浙中賞段已解價計銀三萬六千餘越五年不給織戶  
紛紛告擾閭閻生計蕭索亦坐此朝廷富有四海奚吝  
此乃知前歲兵民恣睢以上下之情不通也錢已預給  
應留應抵者詳咨文中惟題請至懇

與黃思軒

浙中佐領年來稍多奮者以得為善之利也然激發全  
賴貴司頃直指君薦者皆卓然可用幸拔其尤以風勵  
他屬使堅其志於閭閻未必無益昌化令鄭國士廉而  
得民者近為一惡宦肆謗致齎捧官註劣考屢覈之無  
左驗而士民驚惶恐劣遷去願緩之果與地方不相宜  
則為疏請改調未晚也

與王蓮塘太史



聞蓮泉令弟之變傷之而頃得蓮洲年兄書則又知有  
鼓盆之戚別來不三載何福宅亦多難如此乃純入浙  
後連失兩女則罪多天降之罰也喜明公春闈得士為  
公家梁棟何論桃李行且見鹽梅和羹於明公為梓里  
重南太宰當即柄用永昌可與膚施富平同當大任純  
親老又行能薄歸田意甚切獨今不可言耳書且發會  
故新昌令以竿牘至極感注存

溫恭毅集卷二十六